



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁ**

ք. Երևան

05.06.2020թ.

Ո Ր Ո Շ ՈՒ Մ

**ՀՀ գնումների հետ կապված բողոքներ քննող անձի
թիվ ՍՑ-ՆԳ-2020/109**

Հայաստանի Հանրապետության գնումների հետ կապված բողոքներ քննող անձը՝ ի դեմս Գրիգոր Ներսիսյանի, ուսումնասիրելով Հայաստանի Հանրապետության ֆինանսների նախարարության՝ 19.05.2020թ. թիվ 26/26-1/7363-2020 գրությամբ Ա/Ձ Անուշ Պետրոսյանին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգով ներկայացված հիմքերը, պարզեցի հետևյալը.

1. ՀՀ ֆինանսների նախարարության կողմից ներկայացված փաստերը և պահանջը.

ՀՀ ֆինանսների նախարարությունը, ՀՀ ոստիկանության՝ 15.05.2020թ. թիվ 3/4/18450-20 գրության հիման վրա, 19.05.2020թ. թիվ 26/26-1/7363-2020 գրությամբ նախաձեռնել է Ա/Ձ Անուշ Պետրոսյանին (հետայսու նաև՝ Մասնակից) գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

2. Ա/Ձ Անուշ Պետրոսյանի կողմից ներկայացված փաստարկները և դիրքորոշումը.

Ա/Ձ Անուշ Պետրոսյանը 27.05.2020թ. Գնումների հետ կապված բողոքներ քննող անձին ներկայացրել է դիրքորոշում, որով հայտնել է հետևյալը.

«ՀՀ ոստիկանության զորքերի և Ա/Ձ Անուշ Պետրոսյանի միջև 25.12.2019թ. կնքվել է «ՀՀ ԿԱ ՈՁ ԳՀԾՁԲ-20/9/Բ/5/ԿԾ-20» ծածկագրով տպիչ սարքերի լիցքավորման և վերանորոգման ծառայությունների մատուցման պայմանագիր (հետայսու նաև՝ Պայմանագիր), որի 1-ին կետի 1.1 ենթակետի համաձայն՝ Ա/Ձ Անուշ Պետրոսյանը ստանձնում է տպիչ սարքերի լիցքավորման և վերանորոգման ծառայությունների մատուցման պարտավորությունը (հետայսու նաև՝ ծառայություն) համաձայն սույն պայմանագրի N 1 հավելվածով՝ Տեխնիկական բնութագիր-գնման-ժամանակացույցի պահանջների:

ՀՀ ոստիկանության զորքերը ՀՀ ֆինանսների նախարարությանը ուղղված համապատասխան գրությամբ հայտնել է հետևյալը.

«ՀՀ ոստիկանության զորքերի և Ա/Ձ Անուշ Պետրոսյանի միջև 25.12.2019թ. կնքված թիվ «ՀՀ ԿԱ ՈՁ ԳՀԾՁԲ-20/9/Բ/5/ԿԾ-20» ծածկագրով տպիչ սարքերի լիցքավորման և վերանորոգման ծառայությունների մատուցման պայմանագրի շրջանակներում Ա/Ձ Անուշ Պետրոսյանը ստանձնած պարտավորությունները կատարել է ոչ պատշաճ՝ հրաժարվել է ապահովել Պայմանագրի թիվ 1 հավելվածով սահմանված պայմաններով ծառայության մատուցումը»:

ՀՀ Սահմանադրության 86-րդ հոդվածի 1-ին մասի 1-ին կետի համաձայն՝ տնտեսական, սոցիալական և մշակութային ոլորտներում պետության քաղաքականության հիմնական նպատակներն են գործարար միջավայրի բարելավումը և ձեռնարկատիրության խթանումը:

«Գնումների մասին» ՀՀ օրենքի (հետայսու նաև՝ Օրենք) 6-րդ հոդվածի 1-ին մասի 6-րդ կետի «ա» ենթակետը սահմանում է, որ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի

միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը:

Գնումների հետ կապված բողոքներ քննող անձի ուշադրությունն ենք հրավիրում հետևյալ հանգամանքների վրա, որոնք էական նշանակություն ունեն Ա/Ձ Անուշ Պետրոսյանին գործընթացին մասնակցելու իրավունք չունեցող մասնակիցների ցուցակում ներառելու հարցը որոշելիս.

1. Ինչպես արդեն նշել ենք, ՀՀ ոստիկանության զորքերի կողմից ՀՀ ոստիկանության զորքերի և Ա/Ձ Անուշ Պետրոսյանի միջև 25.12.2019թ. կնքված թիվ «ՀՀ ԿԱ ՈՁ ԳՀԾՁԲ-20/9/Բ/5/ԿԾ-20» ծածկագրով տպիչ սարքերի լիցքավորման և վերանորոգման ծառայությունների մատուցման պայմանագիրը լուծվել է՝ հիմքում դնելով այն հանագամանքը, թե իբր Ա/Ձ Անուշ Պետրոսյանը ստանձնած պարտավորությունները կատարել է ոչ պատշաճ՝ հրաժարվել է ապահովել Պայմանագրի թիվ 1 հավելվածով սահմանված պայմաններով ծառայության մատուցումը:

Մինչդեռ՝ «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետը սահմանում է, որ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե խախտել է պայմանագրով նախատեսված պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը:

Այս պարագայում գնումների հետ կապված բողոքներ քննող անձին խնդրում ենք քննարկել ստորև ներկայացվող փաստական հանգամանքի իրավաչափության հարցը՝ կարծես թե ՀՀ ոստիկանության զորքերի կողմից պայմանագրի լուծման համար հիմք է հանդիսացել այն հանգանքը, որ Ա/Ձ Անուշ Պետրոսյանը 24.03.2020թ. սպասարկվող տպիչներից մեկի հետ կապված տվել է եզրակացություն, որով հայտնել է հետևյալ կարծիքը. Ա/Ձ Անուշ Պետրոսյանի մասնագետների դիագնոստիկ ստուգման արդյունքում պարզ է դարձել, որ տպիչ Xerox WorkCentre 3045B վերանորոգման ենթակա չէ: Այս պահի դրությամբ աշխատում է, սակայն տպագրությունը նորմալից բաց է, այդ խնդիրն էլ առաջացել է տպիչի երկար շահագործելուց հետո: Խնդիրը հնարավոր չէ շտկել, ավելի նպատակահարմար է տվյալ տպիչը հանել շահագործումից»:

Վերը նշված գրությունից հետո ՀՀ ոստիկանության զորքերի կողմից 03.04.2020թ. որոշում է կայացվել Xerox WorkCentre 3045B տպիչի վերաբերյալ մասնագիտական

եզրակացություն ստանալ Ա/Ձ Մանվել Ջալալյանից, վերջինս ս.թ. ապրիլի 9-ի ներկայացրել է ԱԿՏ վերտառմամբ գրություն, որտեղ հայտնել է, որ Xerox WorkCentre 3045B տպիչի դիագնոստիկայի արյունքում պարզվել է, որ վնասված է սարքի թմբուկը և կա անհրաժեշտություն ավելացնելու տոներ /developer/, որը պարտադիր է մուգ տպագրության համար: Սարքավորման վերանորոգման գումարը կկազմի 16.000 դրամ:

Այս պարագայում հարկ ենք համարում հայտնել, որ Ա/Ձ Մանվել Ջալալյանը չի հանդիսանում փորձագիտական եզրակացություն տրամադրող լիցենզավորված կազմակերպություն, ավելին, վերջինս հանդիսանում է տվյալ ընթացակարգի շրջանակներում հաջորդող տեղ զբաղեցնող մասնակիցը և մենք կարծում ենք, որ Ա/Ձ Մանվել Ջալալյանն ուներ շահագրգռվածություն տալու այնպիսի եզրակացություն, որով կթերագնահատվեին մրցակից Ա/Ձ Անուշ Պետրոսյանի ծառայությունները, հետևաբար սույն ընթացակարգի շրջանակներում Մանվել Ջալալյանի կողմից ս.թ. ապրիլի 9-ին տրված եզրակացությունը չի կարող քննարկվել բողոքներ քննող անձի կողմից, քանի որ նորից ենք հայտնում, վերջինս չի հանդիսանում փորձագիտական եզրակացություն տրամադրող լիցենզավորված կազմակերպություն և ուղղակիորեն շահագրգռված էր, որպեսզի պատվիրատուն լուծարեր պայմանագիրը Մանվել Ջալալյանի Ա/Ձ-ի հետ:

2. Պայմանագրի 2.1.3 ենթակետի համաձայն՝ Պատվիրատուն իրավունք ունի միակողմանի լուծել պայմանագիրը, եթե Կատարողն էականորեն խախտել է պայմանագիրը: Կատարողի կողմից պայմանագիրը խախտելն էական է համարվում, եթե՝

ա) մատուցված ծառայությունը չի համապատասխանում պայմանագրի թիվ 1 հավելվածով սահմանված պահանջներին,

բ) խախտվել է ծառայության մատուցման ժամկետը:

«Նորմատիվ իրավական ակտերի մասին» ՀՀ օրենքի 41-րդ հոդվածի 1-ին մասի համաձայն՝ նորմատիվ իրավական ակտի նորմը մեկնաբանվում է՝ հաշվի առնելով նորմատիվ իրավական ակտն ընդունելիս այն ընդունող մարմնի նպատակը՝ ելնելով դրանում պարունակվող բառերի և արտահայտությունների տառացի նշանակությունից, ամբողջ հոդվածի, գլխի, բաժնի կարգավորման համատեքստից, այն նորմատիվ իրավական ակտի դրույթներից, ի կատարումն որի ընդունվել է այդ ակտը, տվյալ նորմատիվ իրավական ակտով սահմանված սկզբունքներից, իսկ այդպիսի սկզբունքներ

սահմանված չլինելու դեպքում՝ տվյալ իրավահարաբերությունը կարգավորող իրավունքի ճյուղի սկզբունքներից:

Հետևաբար՝ «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետը սահմանում է, որ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե խախտել է պայմանագրով նախատեսված պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը, իսկ ՀՀ ոստիկանության զորքերի կողմից պայմանագրի միակողմանի լուծման գրությամբ արձանագրվել է, որ Ա/Ձ Անուշ Պետրոսյանը ստանձնած պարտավորությունները կատարել է ոչ պատշաճ՝ հրաժարվել է ապահովել Պայմանագրի թիվ 1 հավելվածով սահմանված պայմաններով ծառայության մատուցումից:

Մինչդեռ Ա/Ձ Անուշ Պետրոսյանը երբեք չի հրաժարվել «ՀՀ ԿԱ ՈՁ ԳՀԾՁԲ-20/9/Բ/5/ԿԾ-20» ծածկագրով պայմանագրի իրեն վերապահված պարտականություններից՝ ծառայությունները իրականացրել է պատշաճ, որի դիմաց ՀՀ ոստիկանության զորքերը կատարել է համապատասխան վճարումներ, իսկ թե երբ և ինչպես է Ա/Ձ Անուշ Պետրոսյանը հրաժարվել է Պայմանագրով նախատեսված ծառայությունների մատուցումից, ապա այս դեպքում գտնում ենք, որ ապացուցման բեռը պետք է դրվի ՀՀ ոստիկանության զորքերի վրա, քանի որ այդպիսի տեղեկատվություն կամ գրություն ուղղակի առկա չէ:

Որպես ծառայությունների մատուցումից հրաժարվել չի կարող մեկնաբանվել նաև Ա/Ձ Անուշ Պետրոսյանի 24.03.2020թ. պատվիրատուին ուղղված գրությունը, քանի որ ԱՁ-ն ընդամենը հայտնել է կարծիք, որ Xerox WorkCentre 3045B այդ պահի դրությամբ աշխատում է, սակայն տպագրությունը նորմալից բաց է, այդ խնդիրն էլ առաջացել է տպիչի երկար շահագործելուց հետո, և նպատակահարմար է տվյալ տպիչը հանել շահագործումից:

Փաստացիորեն, Պայմանագիրը նախատեսում է պայմանագիրը լուծելու երկու հիմք՝ մատուցված ծառայությունը չի համապատասխանում պայմանագրի թիվ 1 հավելվածով սահմանված պահանջներին և խախտվել է ծառայության մատուցման ժամկետը:

Այստեղ պետք է նկատի ունենալ, թե արդյոք առկա է եղել այս հիմքերից որևիցե մեկը, որի պայմաններում ՀՀ ոստիկանության զորքերի կողմից պայմանագրի

միակողմանի լուծումը կարող է համարվել իրավաչափ: Ակնհայտ է, որ տվյալ դեպքում Պատվիրատուի կողմից չի արձանագրվել, որ Ա/Ձ Անուշ Պետրոսյանի մատուցված ծառայությունը չի համապատասխանում պայմանագրի թիվ 1 հավելվածով սահմանված պահանջներին կամ խախտվել է ծառայության մատուցման ժամկետը, այլ ընդամենը վերացական, անհիմն նշվել է, որ Ա/Ձ-ն հրաժարվել է պայմանագրի կատարումից: Վերոհիշյալ փաստը, նախ, չի համապատասխանում իրականությանը, և երկրորդ, այս հիմքը չի տեղավորվում Պայմանագրի 2.1.3-րդ ենթակետով սահմանված պայմանագիրը միակողմանի լուծելու հիմքերի շրջանակներում:

Արդյունքում ՀՀ ոստիկանության գորքերի կողմից թույլ տված ոչ իրավաչափ գործողությունների արդյունքում է Ա/Ձ Անուշ Պետրոսյանը հայտնվել է «Գնումների գործընթացին մասնակցելու իրավունք չունեցող մասնակիցների ցուցակում» ներառվելու վտանգի առջև»:

Ամփոփելով վերոգրյալը՝ Մասնակիցը խնդրել է իրեն չվերագրել «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետով նախատեսված գնման գործընթացի շրջանակներում ստանձնած պարտավորության խախտում և վերջինիս չներառել գնումների գործընթացին մասնակցելու իրավունք չունեցող մասնակիցների ցուցակում:

Ա/Ձ Անուշ Պետրոսյանը, պատշաճ ծանուցված լինելով ՍՑ-ՆԳ-2020/109 ընթացակարգի շրջանակներում 25.05.2020թ. ժամը 12:00-ին հրավիրված նիստի վերաբերյալ, չի ապահովել իր ներկայացուցչի մասնակցությունը:

3. ՀՀ ոստիկանության կողմից ներկայացված փաստարկները և դիրքորոշումը.

ՀՀ ոստիկանությունը (հետայսու նաև՝ Պատվիրատու) ՀՀ ֆինանսների նախարարությանն ուղղված 15.05.2019թ. թիվ 3/4/18450-20 գրությամբ հայտնել է, որ ՀՀ ոստիկանության գորքերի և Ա/Ձ Անուշ Պետրոսյանի միջև 25.12.2019թ. կնքված թիվ «ՀՀ ԿԱ ՈՁ ԳՀԾՁԲ-20/9/Բ/5/ԿԾ-20» ծածկագրով՝ տպիչ սարքերի լիցքավորման և վերանորոգման ծառայությունների մատուցման պայմանագրի շրջանակներում Ա/Ձ Անուշ Պետրոսյանը ստանձնած պարտավորությունները կատարել է ոչ պատշաճ՝ հրաժարվել է

ապահովել Պայմանագրի թիվ 1 հավելվածով սահմանված պայմաններով ծառայության մատուցումը:

Պատվիրատուն, պատշաճ ծանուցված լինելով ՍՑ-ՆԳ-2020/109 ընթացակարգի շրջանակներում 25.05.2020թ. ժամը 12:00-ին հրավիրված նիստի վերաբերյալ, չի ապահովել իր ներկայացուցիչների մասնակցությունը:

4. ՍՑ-ՆԳ-2020/109 ընթացակարգի քննության համար էական նշանակություն ունեցող փաստերը.

ՍՑ-ՆԳ-2020/109 ընթացակարգի քննության համար էական նշանակություն ունեն հետևյալ փաստերը.

1. ՀՀ ոստիկանության զորքերի և Ա/Ձ Անուշ Պետրոսյանի միջև 2019 թվականի դեկտեմբերի 25-ին կնքվել է «ՀՀ ոստիկանության զորքերի կարիքների համար տպիչ սարքերի լիցքավորման և վերանորոգման ծառայությունների մատուցման» N «ՀՀ ԿԱ ՈՁ ԳՀԾՁԲ-20/9/Բ/5/ԿԾ-20» պետական գնման պայմանագիր, որով Կատարողը ստանձնել է տպիչ սարքերի լիցքավորման և վերանորոգման ծառայությունների մատուցման պարտավորությունը՝ համաձայն Պայմանագրի անբաժանելի մասը կազմող N 1 հավելվածով սահմանված Տեխնիկական բնութագիր-գնման ժամանակացույցի պահանջների:

2. Պատվիրատուի կողմից 15.05.2020թ. www.gnumner.am տեղեկագրում հրապարակվել է «ՀՀ ԿԱ ՈՁ ԳՀԾՁԲ-20/9/Բ/5/ԿԾ-20» ծածկագրով պայմանագիրը միակողմանի մասնակի լուծելու մասին ծանուցումը:

5. ՀՀ գնումների հետ կապված բողոքներ քննող անձի հիմնավորումները և եզրահանգումը.

ՀՀ գնումների հետ կապված բողոքներ քննող անձ Գրիգոր Ներսիսյանս, ուսումնասիրելով ՀՀ ֆինանսների նախարարության՝ 19.05.2020թ. թիվ 26/26-1/7363-2020 գրությունը, ՀՀ ոստիկանության՝ 15.05.2020թ. թիվ 3/4/18450-20 գրությունը և կից փաստաթղթերը, հայտնում եմ հետևյալը.

« քաղաքացիական օրենսգրքի 345-րդ հոդվածի 1-ին մասի համաձայն՝ պարտավորության ուժով մի անձը (պարտապանը) պարտավոր է մեկ այլ անձի (պարտատիրոջ) օգտին կատարել որոշակի գործողություն. այն է՝ վճարել դրամ, հանձնել գույք, կատարել աշխատանք, մատուցել ծառայություն և այլն, կամ ձեռնպահ մնալ որոշակի գործողություն կատարելուց, իսկ պարտատերն իրավունք ունի պարտապանից պահանջել կատարելու իր պարտականությունը:

Նույն օրենսգրքի 408-րդ հոդվածի համաձայն՝ պարտավորության խախտում է համարվում այն չկատարելը կամ անպատշաճ (կետանցով, ապրանքների, աշխատանքների և ծառայությունների թերություններով կամ պարտավորության բովանդակությամբ որոշվող այլ պայմանների խախտմամբ) կատարելը:

«Գնումների մասին» ՀՀ օրենքի 6-րդ հոդվածի 1-ին մասի 6-րդ կետի համաձայն՝ բացառությամբ նույն օրենքի 23-րդ հոդվածի 1-ին մասի 1-ին, 3-րդ, 4-րդ և 5-րդ կետերով նախատեսված ընթացակարգով գնում կատարելու դեպքերի, գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Օրենքի 6-րդ հոդվածի 2-րդ մասը սահմանում է, որ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում գնումների հետ կապված բողոքներ քննող մարմնում՝ առանց վճարի: Տվյալ մասնակցի կարծիքը լսելուց հետո գնումների հետ կապված բողոքներ քննող անձը սույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին սույն հոդվածով

նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

Այսպես՝ ՀՀ ոստիկանության զորքերի և Ա/Ձ Անուշ Պետրոսյանի միջև 2019 թվականի դեկտեմբերի 25-ին կնքվել է «ՀՀ ոստիկանության զորքերի կարիքների համար տպիչ սարքերի լիցքավորման և վերանորոգման ծառայությունների մատուցման» N «ՀՀ ԿԱ ՈՋ ԳՀԾՁԲ-20/9/Բ/5/ԿԾ-20» պետական գնման պայմանագիր, որով Կատարողը ստանձնել է տպիչ սարքերի լիցքավորման և վերանորոգման ծառայությունների մատուցման պարտավորությունը՝ համաձայն Պայմանագրի անբաժանելի մասը կազմող N 1 հավելվածով սահմանված Տեխնիկական բնութագիր-գնման ժամանակացույցի պահանջների:

Ա/Ձ Անուշ Պետրոսյանը ՀՀ ոստիկանության զորքերին ուղղված 24.03.2020թ. գրությամբ հայտնել է հետևյալը.

«Մասնագետների դիագնոստիկ ստուգման արդյունքում պարզ է դարձել, որ տպիչ «Xerox WorkCentre 3045B» վերանորոգման ենթակա չէ:

Այս պահի դրությամբ աշխատում է, սակայն տպագրությունը նորմալից բաց է, այդ խնդիրն էլ առաջացել է տպիչի երկար շահագործելուց հետո:

Խնդիրը հնարավոր չէ շտկել, ավելի նպատակահարմար է տվյալ տպիչը հանել շահագործումից»:

Այնուհետև՝ ՀՀ ոստիկանության զորքերը Ա/Ձ Մանվել Զալավյանին ուղղված 03.04.2020թ. գրությամբ խնդրել է Ա/Ձ Մանվել Զալավյանին տալ մասնագիտական եզրակացություն նշված սարքի անսարքության վերաբերյալ և նշել վերանորոգման հնարավոր տարբերակները:

Ա/Ձ Մանվել Զալավյանի կողմից 09.04.2020թ. կազմվել է համապատասխան ակտ, համաձայն որի, վերջինս հայտնել է, որ «Xerox WorkCentre 3045 S/N 3192314800» բազմաֆունկցիոնալ սարքի դիագնոստիկայի արդյունքում պարզվել է, որ վնասված է սարքի թմբուկը, և կա անհրաժեշտություն ավելացնելու տոներ (developer), որը պարտադիր է մուգ տպագրության համար: Միևնույն ժամանակ նշելով այն մասին, որ սարքավորման վերանորոգման գումարը կկազմի 16.000 դրամ:

20.04.2020թ. ՀՀ ոստիկանության զորքերի կողմից կազմվել է զեկուցագիր այն մասին, որ 2020թ ընթացքում ոստիկանության զորքերի տպիչ սարքերի վերանորոգման

և քարթրիջների լիցքավորման աշխատանքներն իրականացնող Ա/Ձ Անուշ Պետրոսյանի կողմից վերանորոգման և լիցքավորման աշխատանքները հաճախակի կատարվում են թերություններով՝ խախտելով «ՀՀ ԿԱ ՈՁ ԳՀԾՁԲ-20/9/Բ/5/ԿԾ-20» պայմանագրի Հավելված 1-ի պարտադիր պայմանների 3-րդ և 5-րդ կետերի պահանջները, ինչը խոչընդոտում է զորամասերի առօրյա ծառայողամարտական խնդիրների կատարմանը: Նշված խնդիրները վերացնելու համար 06.03.2020թ. Ա/Ձ Անուշ Պետրոսյանին ուղարկվել է ծանուցում, որին ի պատասխան հայտնվել է, որ վերանորոգման ենթակա տպիչներից մեկը հնարավոր չէ վերանորոգել և այն պիտանի չէ հետագա շահագործման համար: Դրանից հետո դիմել են նմանատիպ գործունեությամբ զբաղվող Ա/Ձ Մանվել Զալավյանին՝ նշված սարքի անսարքության վերաբերյալ մասնագիտական եզրակացություն ստանալու և վերանորոգման հնարավոր տարբերակներն իմանալու համար, որին ի պատասխան՝ Ա/Ձ Մանվել Զալավյանը հայտնել է, որ նշված տպիչ սարքը ենթակա է վերանորոգման և վերանորոգումը կարժենա 16.000 դրամ:

Այնուհետև՝ ՀՀ ոստիկանության զորքերը, Ա/Ձ Անուշ Պետրոսյանին ծանուցելով Պայմանագիրը մասնակի միակողմանի լուծելու մասին, հայտնել է, որ Պայմանագրի շրջանակներում Ա/Ձ Անուշ Պետրոսյանը ստանձնած պարտավորությունները կատարել է ոչ պատշաճ, հրաժարվել է ապահովել Պայմանագրի N 1 հավելվածով սահմանված պայմաններով ծառայության մատուցումը:

Համաձայն Պայմանագրի 2.1.3-րդ կետի՝ Պատվիրատուն իրավունք ունի միակողմանի լուծել պայմանագիրը, եթե Կատարողն էականորեն խախտել է պայմանագիրը, ընդ որում՝ պայմանագրի 2.1.3-րդ կետի «ա» ենթակետի համաձայն Կատարողի կողմից պայմանագիրը խախտելն էական է համարվում, եթե մատուցված ծառայությունը չի համապատասխանում պայմանագրի N 1 հավելվածով սահմանված պահանջներին:

Ելնելով վերոգրյալից և հիմք ընդունելով ՀՀ կառավարության 04.05.2017թ. թիվ 526-Ն որոշմամբ հաստատված «Գնումների գործընթացին կազմակերպման մասին» կարգի 33-րդ կետի 16-րդ ենթակետը և Պայմանագրի 7.9-րդ կետը՝ ՀՀ ոստիկանության զորքերը 14.05.2020թ. միակողմանի մասնակի լուծել է թիվ «ՀՀ ԿԱ ՈՁ ԳՀԾՁԲ-20/9/Բ/5/ԿԾ-20» պայմանագիրը:

Պատվիրատուի կողմից 15.05.2020թ. www.gnumner.am տեղեկագրում հրապարակվել է «ՀՀ ԿԱ ՈՁ ԳՀԾՁԲ-20/9/Բ/5/ԿԾ-20» ծածկագրով պայմանագիրը միակողմանի մասնակի լուծելու մասին ծանուցումը:

«ՀՀ ԿԱ ՈՁ ԳՀԾՁԲ-20/9/Բ/5/ԿԾ» ծածկագրով ընթացակարգի (հետայսու նաև՝ Ընթացակարգ) գնահատող հանձնաժողովի 05.12.2019թ. թիվ 3 արձանագրության համաձայն՝ Ա/Ձ Մանվել Զալալյանը հանդիսանում է 2-րդ տեղ զբաղեցրած մասնակից:

Այսպիսով՝ ՀՀ ոստիկանության զորքերի կողմից թիվ «ՀՀ ԿԱ ՈՁ ԳՀԾՁԲ-20/9/Բ/5/ԿԾ-20» պայմանագրի լուծման հիմք հանդիսացել է Ա/Ձ Մանվել Զալալյանի կողմից տրամադրված մասնագիտական կարծիքը. Գնումների հետ կապված բողոքներ քննող անձը նշված մասնագիտական կարծիքը չի դիտարկում որպես հիմնավոր և օբյեկտիվ հիմք՝ Պայմանագիրը լուծելու համար, քանի որ այն տրվել է Ընթացակարգի շրջանակներում երկրորդ տեղ զբաղեցրած մասնակցի կողմից: Ուստի գտնում եմ, որ Ա/Ձ Մանվել Զալալյանի կողմից տրամադրված մասնագիտական կարծիքը բավարար հիմք չի կարող համարվել՝ արձանագրելու համար Ա/Ձ Անուշ Պետրոսյանի կողմից իր և ՀՀ ոստիկանության զորքերի միջև 25.12.2019թ. կնքված թիվ «ՀՀ ԿԱ ՈՁ ԳՀԾՁԲ-20/9/Բ/5/ԿԾ-20» պայմանագրի էական խախտման փաստը, հետևաբար նաև՝ Մասնակցի կողմից «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետի խախտման փաստը: Հետևաբար գտնում եմ, որ Ա/Ձ Անուշ Պետրոսյանին գնումների գործընթացին մասնակցելու իրավունք չունեցող մասնակիցների ցուցակում ներառելու հիմքեր առկա չեն:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասի 2-րդ կետով՝

Ո Ր Ո Շ Ե Ց Ի

Հայաստանի Հանրապետության ֆինանսների նախարարության՝ 19.05.2020թ. թիվ 26/26-1/7363-2020 գրությամբ Ա/Ձ Անուշ Պետրոսյանին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը մերժել:

ՀՀ գնումների հետ կապված բողոքներ քննող անձի որոշումն իրավապարտադիր է և ուժի մեջ է մտնում տեղեկագրում հրապարակվելու հաջորդ օրը:

ՀՀ գնումների հետ կապված բողոքներ քննող անձի որոշումը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**Գնումների հետ կապված
բողոքներ քննող անձ՝**

A circular official stamp in blue ink is partially obscured by a handwritten signature in blue ink. The stamp contains text in Armenian, including "ՀՀ ԳՆՈՒՄՆԵՐԻ ԿԵՆՏՐԱԿԱՆ ԿՐԻՄԻՆԱԿԱՆ ԿՈՄԻՏԵ" (Central Criminal Committee of the Republic of Armenia) and "ԳՆՈՒՄՆԵՐԻ ԿԵՆՏՐԱԿԱՆ ԿՐԻՄԻՆԱԿԱՆ ԿՈՄԻՏԵ" (Central Criminal Committee of the Republic of Armenia).

ԳՐԻԳՈՐ ՆԵՐՍԻՍՅԱՆ